

**Sagi tɛ, Polɛ nɛ pɔ́pɔ́nɪ v pa
Filipɛ
Kɛrisɛ lià tɛ nɛ
Filipɛ tiàn sagi tɛ yuu wa
sugv**

Liù tɛ, v nɛ pɔ́pɔ́nɪ sagi kv tɛ
Kv yi *tɔntɔnv Polɛ nɛ pɔ́pɔ́nɪ kv.

Lià tɛ nɛ, Polɛ nɛ pɔ́pɔ́nɪ
Polɛ pɔ́pɔ́nɪ sagi kv tɛ v pa *Kɛrisɛ lià tɛ
nɛ, ba nɛ wulɛ Filipɛ tɪfarv wa. Filipɛ yi kv
wulɛ Masedwanɛ nagwanaa tɛ wa. Polɛ nɛ dɪga
Kɛrisɛ lià pɔ́lɪ tɛntɛ dɛn, kv mù ga nɛ yi Kɛrisɛ
lià pɔ́lɛ tɛ wa tɛntɛn pɔ́lɪ nasara luv wa. Polɛ
swɛ Kɛrisɛ lià pɔ́lɪ tɛntɛ zɛnzɛn.

Sagi tɛ wa sugv

Nɛŋɛ kv tɛ yɪrɪ Polɛ nɛ pɔ́pɔ́nɪ ba nɛ: Polɛ
wulɛ bàn diè, *Kɛrisɛ lià tɛ Filipɛ nɛ ga pa zilɛ
wiɛn bà, tɛ pa wá, yá v dɛn kɛni ba lɛɛɛɛ.

Polɛ pià v birɪ dɛ, càn yɪ Kɛrisɛ lià tɛ, yá dɛ
kv nɛtv mɛ, ba tɛ mɛ, sɛ ba ya pupwɛn wa, ba
tɛ mɛ, sɛ ba vwɛ ba tiàn *Yuu-Tiu Zwezi-Kɛrisɛ
nɛ, ba mɛ, sɛ ba tɪŋa ba pɪn duɛn nɛ, ba ga mɛ,
sɛ ba sɔnɪ duɛn dɛ ba waa mama, ndɛ v mù Polɛ
nɛ.

Polɛ jùnɪ Kɛrisɛ lià tɛ Filipɛ nɛ

¹ À mù Polè dè Timote nè yí Zwezi-*Kerisè tótunbía. Nè púpóní sagí kú tē, nè pín á mù, Filipè lià tē mama, á nè yí Zwezi-Kerisè nè tí. Nè púpóní kú, nè pín á yáá tián tē nè dē á tótunbía tē nè. ² Nè nyina Yú dē nè *Yuu-Tiu Zwezi-Kerisè nè wá fwa pubwanú á yíra, ba ga pa aba bican sié.

*Won tē, Polè nè lòrì Yú con, Filipè tián yíri
(Kolosè tián 1.3-11)*

³⁻⁴ Máná mama, à nè swìn á yoo à nyina Yú con, à yáá kē v lèèèe á yíri. Yá à yáá fwa kú nētú tē dē pupwən. ⁵ Kú zígí dún tē nè, á nè jigè *Kerisè lià, kú ja bà kú yí zèn, á mù dē à mù nè tūŋa duən nè, nè swìn Zwezi-Kerisè suywánú tē, nè bírí. Kú mù nè pín, à kēni Yú lèèèe. ⁶ Á yèò dē, cígá mama Yú dígá tótunzēŋu dèñ á bicaní wa. Yá kú ja vèlè dún tē nè, Zwezi-Kerisè nè wá píí v bà, v wá fwa kú, v zwèe.

⁷ Yú fwa v pubwanú tē à yíra, v ga fwa kú vàn don á dē yíra. Ba vwè nè dē banzala, yá à wá swìn Zwezi-Kerisè suywánú tē, à bírí. Á wá pa ba lwarí dē, kú yí cígá, lià tē, ba nè búrì búrà tē yáá con, dē diàn. Kú mù nè pín, à jè cígá, sè à ja pubŋa tētè dē á mama, à nè ken á yoo à bican wa. ⁸ Á yoo yì nè zēnzēn. Yú yèò zēni dē, kú tà kunkun nè á kuni. Kú yí Zwezi-Kerisè sonu tē nè, à ma swè aba.

⁹ Yá won tē, à dàñ nè lòrì Yú con, kú mù nè yí, sè á sonu tē sùrí, wuuu kú ja lè. Kú mù nè wá pa aba yēnu, sè á wàní á lwarí nētú tē, á nè mē, sè á fwa. ¹⁰ Yá á dàñ wá wàní á kúrí kú tē

nə jə funə. Ku nətɔ tə dān wá pa, dɔn tə, Zwezi-Kərisə nə wá pìl ɔ bà, á bɪcɪnɪ wá ya nəpon, á ga bá ja yokɔkwɪnan, ba nə wá caga á nií tə nə yɪrɪ. ¹¹ Yá ku máná tə wa, á wá ya là tə, á twá də Zwezi-Kərisə, á ma tɔŋa tɔtɔnzəŋə zənzən, tə nə bɪrɪ də, á yɪ cígá tìán Yɪ yáá con. Ku mù nə wá pa, là pa dun Yɪ nə, ba ga bu ɔ nə.

Zwezi-Kərisə dwə won mama

(Marəkə 9.38-40; Romə tìán 14.7-8; 2 Korəntə tìán 5.1-9)

¹² À nubɪa-ba, yìèn tə, tə nə yí nə, à pià, sə á lɔwɪrɪ də, tə san tə pa Zwezi-*Kərisə sɔyɔwánú tə kwɛn ku va yáá. ¹³ Ku yɪ cígá, mə ku twá də tə mù yìèn təntə, tə nə yí nə, pamana tə mama, ba nə wulə bɔrà diè tə wa, də ba duən tə mama ma yəó də, ku yɪ Zwezi-Kərisə yɪrɪ, ba vwə nə də banzala. ¹⁴ Ba vwə nə də banzala ku ga pa là tə zɔnɪ, ba nə yɪ à nubɪa Kərisə yɪrɪ, tə jə *Yuu-Tiu diàn ɔ cwəŋə tə wa. Yá ku dān pɪn, ba kwɛn ba swìn Yɪ sɔgɔ tə də wɔdɪɔ, fən də ga ba ba jə.

¹⁵ Ba wa là duən yɪ ba swìn Zwezi-Kərisə sɔyɔwánú tə də wɔgwɪɔ, ba ma jɪga à mù Polə nə. Yá ba duən mù yɪ, ba swìn ku, də ba waa mama. ¹⁶ Ba mù fwa ku də sonɪ, ba ga yəó də, Yɪ nə ken nə yəbə, sə à swìn Zwezi-Kərisə sɔyɔwánú tə də diàn, à bɪrɪ də, ku yɪ cígá. ¹⁷ Ba duən tə mù yɪ ba swìn Zwezi-Kərisə sɔyɔwánú tə, sə ba ma jɪgɪ də nə. Ba sùràn tə tà də ba waa mama. Ba fwa nətɔ, ba ga buŋa də, ba wá sùrí à càn tə, à nə wulə tə wa, à banzala tə wa. ¹⁸ Ku tà à yáá. Ba duən pubɔŋɪ wáá pubɔnkɔkwɪnan tə yanɪ. Ba duən də pubɔŋɪ wáá pubɔnzəŋə tə yanɪ. Yá ba

ga nè swìn Zwezi-Kørisè suywánú tē, à mù Polè tē wulè pupwèn wa, ku yoo tē yiri. Cígá mama, à tē wá kwèn à jwε, à súrí lá wuuu. ¹⁹ À yèé dē, ku nètɔ nè wá pa Yɪ jon nè. Ku nètɔ wá twá dē á yɪjɔnɪ dē Zwezi-Kørisè *Sɪɲu tē, ku dē nè sɔɲa nè. ²⁰ À swə, sə yoo ku tē tɔn. À jə ku yala, dē à waa mama. Ku mù nè yɪ, sə à cì yoo dàn ká ya lá, cavɪra nè wá ja nè ku yiri, sə à tətə dàn wá kwèn, à lɪ à waa con síún nè, ndə fuən tē nè. Yá ku dàn nè twá à lɔɔ wulu nè, nè à yèé à tian nè, ba wá pa dun Zwezi-Kørisè nè. ²¹ À mù Polè con nè, Zwezi-Kørisè nè pɪn, à mu tē jə dèñ. Yá tian dàn jə nywarɪ tē pa nè.

²² Yá à mu nè wulè lɔɔ wa, à tē wáá tutɔnzəɲu à fwa. Ku mù nè pɪn, à kúv yèrì ku tē, à nè wá kúrí à tì. ²³ À dàn yɪ à wulè yìèn bəlè tətəɲi wa. Vàn don nè, à swə zəni, sə à tɪ, sə à ya dē Zwezi-Kørisè. Ku mù ga nè wá ya ywání dē nè zənzən. ²⁴ Yá vàn don dē nè, á mù yiri nè, à mu nè wulè lɔɔ, sə à san aba, ku dē jə funə zənzən, ku doni. ²⁵ À yèé dē, cígá mama ku yɪ nètɔ, à ga yèé dē, à bá tɪ, à wá ya dē aba. À wá san aba, sə á va yáá Yɪ nyiən tē wa. Yá á dàn wá jwε, á nè keni á waa Zwezi nè wuuu, tē yiri. ²⁶ Mánǵá tē, à nè wá pìí à bà á con, á dàn wá lɔɔ Zwezi-Kørisè nè zənzən á ja lɛ, à nè pìí á bà á con yiri.

(1 Tesalonikè tìán 2.12-16; Ebərə-ba 10.32-36; Tutɔnan 14.22)

²⁷ Yoo tē ku nè dwə, ku mù nè yɪ, sə á ya là tē, á nè twá ku tē nii nè, Zwezi-Kørisè suywánú tē nè bɪrɪ aba. À pìà dē, à nè wá bà, à na aba, nè

à yèé à nè wà twi, sè à nì dè, á zɪga dɪàn, á ga jè nɪmarɔ. À pɪà, sè à nì dè, á kèni dɪàn dè waa nèdɔ, Zwezi-Kèrisè sɔyɔwánjɔ tɛ yɪɪ, á nè sèe. ²⁸ Yá á kùdè ba, á dɔɲa tɛ fɛn durɪ míámíán. Kɔ mù nè wá bɪɪ dè, ba mù yɪ ba tɪ ba jén míámíán Yɪ yáá con, á mù ga wulɛ cwɛɲɛ wa, kɔ nè wá jon aba á cɔna wa. ²⁹ Yá kɔ yoo tɛntɛ yɪ kɔ nan Yɪ. Yɪ nè pɪn aba yuywánjɔ. Kɔ tà, sè á kèni á waa ɔ nè wuuu, cɪcɪ. Kɔ yɪ, sè á dé càn dè ɔ yɪɪ. ³⁰ Síún nè, à mù dè á mù mɛ dàñ nè saɲa duɛn nè, nè jaɲa. Á dí yáá á na jaɲa tɛ, à nè jaɲa. Yá síún nè, á nèñ dè, à tɛ wulɛ jaɲa tɛ wa.

2

Á yana ndè Zwezi nè

(Romè tián 15.1-7; 2 Korèntè tián 8.9; Kolosè tián 1.15-20; Ebərə-ba 1.1-4)

¹ Á kèn á waa Zwezi-*Kèrisè nè. Kɔ nètu pɪn súrí á bɪcànɪ naaa? Ʋ sonu tɛ dàn á jìàn naaa? Á nɪ torɪ Yɪ-*Sɪɲu tɛ tarpɪɔn tɛ wa naaa? Yɪ fwa pubwanɔ á yɪra naaa? Yɪ dèri á yinɛgɛ zɛnzɛn naaa? ² Dè kɔ nè yɪ nètu, à lòrì aba, sè á sóní duɛn dè Kèrisè sonu tɛntɛ, sè á ja pubɔɲa nèdɔ, sè á nii ya nèdɔ. Á nè fwa nètu, à pupwɛn tɛ dàñ wá ya cígá cígá pupwɛn. ³ Á dànà ká jɪɪ dè duɛn. Á dànà ká bu á tìàn nè. Á kèni á tìàn tɪa duɛn yáá con. Á ywánjɔ là tɛ ndè là tɛ nè, ba nè wulɛ á yuu wa. ⁴ Á lìù mama dàn ká bún kɔ tɛ nè zìɛn, kɔ pa ɔ mù cɪcɪ nè yoo. Ʋ mɛ, sè ɔ bún kɔ tɛ nè zìɛn, kɔ pa ba duɛn tɛ dè nè.

⁵ Á pian, á pubuŋa tɛ ya ndə Zwezi-Kərisə pubuŋa tɛ nə.

⁶ U də Yu mə yà yi nədu. Yá u ga wà pa ku ya yoo u nə ba pìà, sə u yá ku. ⁷ U yá u dun tɛ mama, u ga jì yonju. U jigə ləzwənə, ba luru wá, ndə ba nə luru ləzoni tɛ nətɔ. ⁸ U sèe u mun u tiàn, u ga zilí Yu nii, u va u ti*. ⁹ Ku mù nə pin, Yu ti wá, u kə dun bwálí wa, tɛ nə dwə won mama. Yu pin wá yuru tɛ, ku nə dwə yuru mama. ¹⁰ Ku twá ku yuru tɛntɛ nə, là tɛ mama, də wiən tɛ mama Yu sàñ nə, də tia yuu wa yəbə, də tia dɛñ mə, wá bà ba tu Zwezi yáá con, ba bu u nə. ¹¹ Liù mama wá súrí u nii, u ga swìn, u biri də Zwezi-Kərisə yi *Yuu-Tiu. Yá ku dǎn wá pa dun nə nyina Yu nə.

Kərisə là tɛ yi ndə poni nə

¹² À nubisoni-ba, máŋá tɛ wa, à mù də á mù nə yun duən nə, á zilí Yu nii. Ku mə, sə á tɛ zilí Yu nii síún nə, máŋá ka tɛ də wa, à nə tɛlɛ á con. Yu jon aba á cuna wa, á dǎn tuŋa ku tutɔnan. Á fwa ku nətɔ də zilɛ zənzən də á vɪvaga u yáá con, ¹³ Yu nə dí yáá u tanɪ aba u tún, sə á sóní yiən tɛ, tɛ nə poli u pùé, u ga pa aba diàn, sə á tun tɛ də yuru. ¹⁴ Ku tɛ mama á nə fwa, á dǎnà ká ŋuŋwɪn. Yá á dǎnà ká fwa tútúná də duən. ¹⁵ Ku mù nə wá pa, á ya là tɛ, á nə ba yoo jə, ba nə wá caga á nii nə ku yuru. Á ga wá ya Yu là tɛ, á bɪcanɪ nə yi nəpon Yu yáá con, á nə ba cuna jə. Á mù də ŋwɪna də wɔlwanyɪna-ba nə

* **2:8** 2.8 Ku ga yi, ba paa wá dagarɔ yuu, u ti.

wulə luv kv tē wa, á mε, sə á ya ba wa, ndə poni nē, kv nē pɪpɪlɪ. ¹⁶ Á mε, sə á swɪn sùràn tē, tē nē pɪn mu, á bɪrɪ là nē. Á nē fwa nətɔ, dɪn tē Zwezi-*Kərisə nē wá pɪi v bà, à mù Polə wá na dɪn v yáá con, á yɪrɪ. Kv nətɔ bɪrɪ də, à càn tē, à nē dí tutɔŋɪ tē wa, də à nē gwàrì tē wà tutɔ twɪ. ¹⁷ Á keni á waa Zwezi nē. Kv yɪ ndə *jɔŋɪ nē, á nē pɪn Yu nē. Ba nē gva nē, à jə pupwən. À mu tē wá ya jɔŋɪ, kv sùrí á jɔŋɪ tē nē. Yá à dàń wá jwε də á mama. ¹⁸ Á də mε, sə á ja pupwən nətɔ, á jwε də nē.

Timote də Epafəroditə yoo

(1 Tesalonikə tián 3.1-11; 1 Korəntə tián 16.15-18)

¹⁹ Də kv nē yɪ *Yuu-Tiu Zwezi fɪra, à jə yala də, à wá tun Timote á con síún. À pìà, sə mánjá tē wa, v nē pɪi v bà à con, sə v dàń à mù Polə jìàn, də tē tē v nē nì á con. ²⁰ Mə v mù cɪcɪ nē yɪ liù v wulə à con, v də pubɔŋa tē nē yɪ ndə à nē, á yoo nē yì wá cígá cígá, ndə à nē. ²¹ Là tē duən tē mama yɪ ba təntɪan yìèn cɪcɪ nē ba bɔŋa. Yá ba ba Zwezi-*Kərisə yìèn tē yuu ywàŋá. ²² Kv nē yɪ Timote mù, á yèé nətɔ tē, v nē bɪrɪ də, v yoo ba kwèe. À mù də v mù mε nē tɔŋa duən nē, nē swɪn Zwezi-Kərisə sɔy wáŋú tē, nē bɪrɪ. U san nē tutɔŋɪ tē wa, ndə bìú nē saŋa v nyɪna nē nətɔ. ²³ À jə yala də, à wá wàní à tun wá á con lala, də à nē nɪ à yìèn tē yáá. ²⁴ À jə yala də, kv nē yɪ Yuu-Tiu fɪra, à tətə Polə wá bà á con síún.

25 À nɪ də, kʊ mɛ, sə à pa Epafəroditə, ʋ nə yɪ à nubiu Kərisə yɪɾɪ, pɪí ʋ bà á con. Á tun wá à con, sə ʋ ja saɲʋ tə, à yà nə pìà, ʋ ja bà ʋ pa nə. Yá à mù də ʋ mù dān ken dīàn nə tun Zwezi tutʋnan tə zənzən. 26 ʋ yɪra liɲa zənzən, sə ʋ na á mama. Yá á yoo ga jə wá, ʋ nə yèé də, á nì də, ʋ yɪra ba zurə yɪɾɪ. 27 Kʊ yɪ cígá, ʋ yà tua yayigʊ, kʊ ga mancɪn, sə ʋ mu zwèe. Yá Yɪ dān dəri ʋ yinəgə. Kʊ tà ʋ mù cɪcɪ yinəgə nə, Yɪ dəri. Kʊ yɪ də à mù Polə mɛ, sə pucʋnɪ nəfarʋ don kùd dān ká yí nə, kʊ sùrí. 28 Kʊ mù nə pɪn, à bɪbarɪ, sə à pa, ʋ bà á con, sə á na wá, sə á ya pupwən wa, sə à də pucʋnɪ tə fʋ kʊ mun. 29 ʋ yɪ á don Kərisə liù nə Yuu-Tiu cwəŋə tə wa. Á zìlé ba mù ləzwənyirə təntə. Máná tə wa, ʋ dān nə twi, sə á sèe, á jon wá də pupwən. 30 ʋ jon á yuu tutʋɲɪ ʋ tun, ʋ mu yà ga pìà kʊ nan, tutʋɲɪ tə yɪɾɪ, á yà nə pìà, sə á tun á pa nə, də á yà nə wulə à con. Kʊ yà ga mancɪn, sə ʋ mu zwèe Kərisə tutʋɲɪ tə yɪɾɪ.

3

*Zwezi-Kərisə dwə won mama
(Galasi tián 5.1-6; 6.12-14; 1 Korəntə tián 9.24-27; 2 Piyerə 1.5-11)*

1 À nubɪa-ba, sugʋ tə, à nə wá ma zwèe nə yɪ kʊ tə: Á mù də *Yuu-Tiu vwə duən nə. Á dān yana pupwən wa. Kʊ ba nə wʋwalɪ, sə à pɪí à bwé kʊ tə wa, à nə dí yáá à swɪn á con. Yá á mù con nə, kʊ mù nə wá pa, á nì kʊ dēn cígá cígá. 2 Lìà wulə, ba tɲa yokʋkwɪnan. Ba yɪ ndə kukuri nə. Ba yoo nə yɪ, sə ba *gwəŋə bɛɛ. Yá

ku ga yi yotutu. Á cia á tián nè dè ba tē! ³ Nè mù nè yi lià tē, nè nè gwəŋə nè tián, yá ku ga jə dèń. Ku tà ba mù. Nè mù nè jə Yui-**Siŋu* tē dián, nè ma tɔŋa nè pɪn Yui nè. Nè pɪn dun nè tián nè Zwezi-Kərisə yiri. Nè ba nè waa kəni ləzoni yofwamɪnan nè.

⁴ Dè lià duən nè buŋa dè, ba mù nè wàá ba waa ba kəni ləzoni yofwamɪnan nè, à mù Polə nè dwə ba. À dè yà wàá à waa à kəni tē nè. ⁵ Á nəŋə yìèn tē, nè pɪn à dwə ba: **Ebərə-ba* nè lɔri nè, à ga yi Ebərə cígá cígá. À yi **Yizərayelə-ba* dwíí, Benzwamen^{*} dwíí dəkuu tē wa. Ba lɔri nè, ba gwəŋə nè, à lɔri dián nana dián nè. ⁶ Ku nè yi Yui **nii* tē yoo wa, à yà yi **Farizian*. À yà jə yawala zənzən, **Zwifə-ba* Yui nii tē yoo wa. Ku mù nè pɪn, à yà fɪfɪn Kərisə lià púlí tē. Ku nè kúbù yi ka twá Zwifə-ba Yui nii tē nè zəni, sə ku ma bɪri dè, à yi cígá tíú, à yà zílí Yui nii tē mama. Yá à yà ba yoo mama jə ba nè wá caga à nii nè ku yiri. ⁷ À yà jələ tē yìèn təntə dè, tē mù nè jə nywarɪ. Yá síún nè Zwezi-Kərisə yiri, à dān jələ tē mama ndə tutu nè. ⁸ Cígá mama, tē mama yi ndə tutu nè. À yèé à Yuu-Tiu Zwezi-Kərisə. Ku mù yənu təntə ga nè dwə won mama. U mù yiri nè à sèe, sə à kwìn tē mama nè, à ga jələ tē mama ndə ywərən nè, sə à wàní à ya Kərisə liú. ⁹ À pià, sə ku twá, à nè ken à waa Zwezi-Kərisə

^{*} **3:5** 3.5 Benzwamen yi **Zwakəbə* talikwa biú, ɔ nè sùrí ɔ bia nii nè, bia fugə bələ. *Zwakəbə* yi *Yizərayelə* yiri don. *Yizərayelə* dwíí tē pwèe pulə fugə bələ. Tə fugə bələ nii nyiən yiri nè yi Benzwamen.

nə, à ma ya cígá tíú Yú yáá con. À kùù bá pià, sə à ya cígá tíú Yú yáá con, à nə zìlí Yú nii tə yoo v nə pɪn *Moyizə nə yɪrɪ. Yú dàń nə pɪn, à yɪ cígá tíú, à nə ken à waa Zwezi nə yɪrɪ. Kú tà à tətə. Kú mù nə pɪn, à dàń yɪ v mù liù míámíán. ¹⁰ Yoo tə à nə pià, kú mù nə yɪ, sə à yəni Zwezi-Kərisə. Yá à pià, sə à yəni diàn tə, v nə ja pií v bwin v nan. Yá à dàń pià, sə à dó càn də wá, sə à ya ndə v nə, mánjá tə wa, v nə tɪga. ¹¹ Də kú nə swə kú yɪ nətɔ mama, sə à də pií à bwin à nan ndə v nə.

Ka dəri ka va yáá wuuu yoo

(Romə tián 16.17-18; Ebərə-ba 13.14; 1 Zwan 3.1-3)

¹² Kú tà à pià, sə à swìn də, à manwarɪ à na kú tə à nə piá. À ma kùù ba pià, sə à swìn də, à yoo mama manwarɪ kú ziən. Yá à dàń yɪ à kəni diàn, sə à wàní à ja wiən təntə, ndə Zwezi-Kərisə nə sèe nə nətɔ. ¹³ À nubɪa-ba, kú tà à wú, à manwarɪ à ja tə wiən təntə. Yá yoo nədu nə, à dàń fwa. Kú mù nə yɪ, à swèéé wiən tə, tə nə kèéń, à ga kəni diàn, sə à yí wiən tə, tə nə wulə yáá. ¹⁴ À dàń yɪ à dəri, à vələ yáá wuuu, sə à wàní à yí lá. Kú mù nə wá pa, à na ŋwírán tə, Yú nə kúrí nəba, sə v pa nəba. Ŋwírán təntə nə yɪ, sə à ya də wá Yú sán nə, Zwezi-Kərisə yɪrɪ.

¹⁵ Nə mù jigə nəkwɪna Yú cwəŋə tə wa. Nə mɛ, sə nə bún nətɔ. Də á nə bún yiri don, Yú nə wá bɪrɪ kú aba. ¹⁶ Kú nə swə, kú yɪ nətɔ mama, nə vələ nə yáá wuuu, cwəŋə tə wa, nə nə yɪn ka wa, kú bà kú yí zèn.

17 À nubia-ba, á mama yana, ndə à nə yɪ nətʊ. Á ywàṅá lià tə, ba nə yɪ ndə nə nə, sə á də ya nətʊ. 18 À dí yáá à swìn tə yìèn təntə á con, nɛɛ kapɔpɔ. Síún nə, à kúò pìí à bwé tə wa, kɔ dān ga yɪ də yɪnɪa. Lià dáá zənzən ba tɔtɔnɛ nə bɪrɪ də, ba yɪ Zwezi-*Kərisə, ɔ nə tɪga dagarɔ tə yuu wa, dɔŋa. 19 Ba mù lià təntə puswənə wiən nə yɪ ba yɪ. Ba tɔŋa yìèn tə nə jə cavɪra, yá ba ga tə pɪn dun ba tìàn nə, də kɔ mɛ. Ba pubɔŋa mama dān yɪ ka wulə tɪa yuu wiən tə con. Máná don biàn Yɪ nə wá cùgò ba. 20 Kɔ nə yɪ nə mù, nə mù yɪ Yɪ *sán lià. Kɔ yɪ nə *Yuu-Tiu Zwezi-Kərisə, ɔ nə jon nəba nə cuna wa, nə dānì, də ɔ naŋa Yɪ sán nə, ɔ cwɪ nə con. 21 U nə twi máná tə wa, ɔ wá lwàn nə yɪra tə, tə nə ba dun jə, ɔ pa tə jì ndə ɔ tətə yɪra tə nə, tə nə jə dun. U wá fwa kɔ nətʊ tə də diàn tə, tə nə pɪn, ɔ wulə wiən tə mama yuu wa.

4

1 À nubisoni-ba, kɔ mù yɪrɪ nə, á dān zɪga zəni, də *Yuu-Tiu máná mama wuuu. À nubia-ba, à swə aba zənzən. À ga pìà, sə à pìí à na aba cígá cígá. À wulə pupwən wa á yɪrɪ. Yá à wá na dun yupuu á mù yɪrɪ.

Sagɪ tə kwìè bwálí

(Filipè tián 2.1-3; 1 Tesalonikè tián 5.16; 1 Piyerə 5.7; Kolosə tián 4.2; Zwakə 3.17-18)

2 À kwè Evodi də Sentiswə, ba mù kana bələ təntə sə ba ja nɪmarɔ, ba nə yɪ *Yuu-Tiu lià tə yɪrɪ. 3 Yá n mù liù tə, n nə yɪ pùé nədʊ tíú, n

ga yi à tütündon, à lòrì mú, sè n san kana bələ təntə nə. À mù, də ba mù, də Kəleman, də tütùnà tə duən nə kálí nə tián nə swìn Zwezi-Kərisə sɔywanjú tə nə bɪrɪ. Yɪ púpúní ba mama yɪra sagɪ wa. Kɪ nətɪ bɪrɪ də, ba jə mɪ tə, kɪ nə ba zwèe ɔ con.

⁴ Á wulə də Yuu-Tiu Á dān yana pupwən wa dɪn mama. À tə kúɔ̀ bwé kɪ wa: Á yana pupwən wa! ⁵ Á pɪan là tə mama lwarɪ də á jə pubwanɔ. Yuu-Tiu túrí bwələ. ⁶ Á dānà ká pa, won mama yoo ja aba. Yoo mama nə twi, sè á twá də yɪjɔnɪ, á lòrì won tə, á nə pìà Yɪ con. Á nə lòrì Yɪ con nətɪ, sè á kə ɔ lèèèe də. ⁷ Yá Yɪ wá pa bɪcan sié aba, tə nə dwə won tə mama nə nə wàá kɪ dèñ nə nì. Bɪcan sié təntə dān wá pa, á fɪra də á pubɔja ya də Zwezi-Kərisə.

⁸ À nubɪa-ba, kɪ tə, à nə wá swìn à gúrí nə yɪ yìèn tətə. Á nənə yìèn tə nə mɛ, sè tə ya á pubɔja yìèn: Tə mù nə yɪ yozənə tə, là nə bwɪ tə nə, də yìèn tə, tə nə yɪ cígá yìèn Yɪ yáá con. Də tə tə ba cɔna jə. Də tə tə ba nə mɛ, sè ba sóní, ba ga bɪrɪ də, tə zìən. Də yofwamɪnan nəzənə ba nə bwɪ tə nə. ⁹ Á də dān fwa yìèn təntə à nə bɪrɪ aba, də tə tə, á nə sèe, də tə tə, á nə nì, də tə tə, á nə nɪ də, à fwa. Yá Yɪ tə, ɔ nə pɪn nəba bɪcan sié, dān wá ya də aba.

*Polə kəni ba lèèèe ba zilá tə yɪrɪ
(Ebərə-ba 13.3, 5, 16; Filipè tián 1.7; 2 Korəntə tián 9.6-15)*

¹⁰ *Yuu-Tiu pɪn, à jə pupwən, á nə kúɔ̀ pìí á wulə á saɲa nə yɪrɪ. Á bɔja à yoo, kɪ dán, yá

á wà wàní, sè á san nè. ¹¹ Kù tà à swìn nètù, won nè mùrì nè yírí. À mì nètù tẹ, à nè wá ya pupwèn wa, yoo mama wa. ¹² À yèé, nètù à nè wá fwa dẹ, won nè mùrì nè. À ma kùdò yèé, nètù à nè wá fwa dẹ, à nè jẹ wièn zènzèn dẹ. Yoo mama wa, à mì ka dọ ka sù, à ga mì nièn janù dẹ. À mì ka ja wièn zènzèn, à ga mì won nè mùrì nè dẹ. ¹³ À wáà tẹ yìèn tẹntẹ mama, à fwa dẹ diàn tẹ, Zwezi-Kerisè nè pín nè. ¹⁴ Yá dẹ nètù mama, á fwa zèni dẹ, á nè san nè à yojanan tẹ wa. ¹⁵ Á mù Filipò tián-ba, á yèé dẹ, kù jùv mama à swìn Zwezi-*Kerisè sùwáṅú tẹ, Masedwanè nagwanaa tẹ wa. Yá à nè pìí à vírí, máṅá tẹ wa, á mù cìcì nè san nè. Kerisè lià púlí don mama wà lá yín à mù dẹ ba mù nè pín wièn duèn nè, nè ga jon wièn duèn con, dẹ kù nè tà á mù cìcì. ¹⁶ À nè kùdò yín Tesalonikè dẹ nè, á nèε bələ me, á nè pín, won tẹ, kù nè mùrì nè, bà kù pa nè. ¹⁷ Kù tà á zìlẹ wièn tẹ, à pìà. Kù tẹ, à nè pìà, kù mù nè yí, sè Yú pa aba kù ṅwírán zènzèn, ndẹ tíú nè zín bia zènzèn nètù. ¹⁸ À ní tẹ tẹ mama, á nè tún à nè, tẹ ga búrí nè. Máṅá tẹ, à nè ní wièn tẹ, Epafèrodite nè ja bà, ọ pa nè, won mama kùdò wà nè mùrì. Tẹ wièn tẹntẹ yí ndẹ tiralí nè, kù lwán nè ywán zèni. Tẹ ga yí ndẹ *joni nè, kù twá Yú fira nè, ọ ga swè tẹ. ¹⁹ Yú yí dun nẹfarù tíú, yá ọ ga wá pa aba, kù tẹ mama nè mùrì aba, Zwezi-Kerisè yírí. ²⁰ Dun tẹ mama me, sè tẹ ya nè nyina Yú nyièn, máṅá mama, wuuu, kù nè ba zwèe. Amúna!

Sagí tẹ jòndà bwálí

²¹ Á jùná là tɛ mama, ba nɛ yɪ *Kərisə nɛ tɪ, á pa nɛ. Kərisə là tɛ, ba nɛ wulə yəbə, də jùnì aba. ²² Kərisə là tɛ mama jùnì aba. Ba tɛ, ba nɛ jùnì aba, ba doni, kɪ mù nɛ yɪ *Romə-ba pìú nɛfarɪ kàrá là tɛ.

²³ *Yuu-Tiu Zwezi-Kərisə pubwanɪ tɛ wá ya də á pubɔɲa tɛ.

Yu soywánó sagı
Nuni, Southern: Yu soywánó sagı New Testament
Le Nouveau Testament en Nun

copyright © 1999 Wycliffe Bible Translators, Inc.

Language: Nuni, Southern

Contributor: Wycliffe Bible Translators, Inc.

All rights reserved.

2020-11-30

PDF generated using Haiola and XeLaTeX on 30 Sep 2022 from source
files dated 8 Feb 2022

d18530a7-7259-5f23-92b6-70e3abe5f3fa